



01
449

Bosnia and Herzegovina
Federation of Bosnia and Herzegovina

CANTON SARAJEVO
Anti-Corruption Office

Broj: 20-04-57021-144/25 FŠ
Sarajevo, 02.02.2026. godine

SKUPŠTINA KANTONA SARAJEVO

Kabinet predsjedavajućeg i zamjenika predsjedavajućeg Skupštine Kantona Sarajevo n/r Predsjedavajućeg Skupštine

PREDMET: Informacija o postupanju po zastupničkoj inicijativi, dostavlja se

Zastupnica u Skupštini Kantona Sarajevo, Sebija Izetbegović, u skladu sa članom 212. stav (2) Poslovnika Skupštine Kantona Sarajevo, u okviru 28. radne sjednice Skupštine Kantona Sarajevo, uputila je zastupničku inicijativu Vladi Kantona Sarajevo i Uredu za borbu protiv korupcije Kantona Sarajevo (u daljem tekstu: Ured), u kojoj se inicira da se uspostavi obaveza izrade godišnjeg izvještaja o zapošljavanju u organima uprave Kantona Sarajevo, i to posebno za svako ministarstvo.

Ured je 29.01.2026. godine, u prilogu akta Skupštine Kantona Sarajevo, broj: 01-04-57021-46/25 od 26.01.2026. godine, zaprimio navedenu zastupničku inicijativu.

Razmatrajući dostavljenu inicijativu, cijenimo što je prepoznat značaj jačanja transparentnosti rada organa izvršne vlasti, unapređenja povjerenja građana u institucije, te prevencije zloupotreba u procesima zapošljavanja, naročito u periodima povećanih rizika, uključujući izborne godine.

Obavještavamo Vas da su ciljevi predmetne inicijative u Kantonu Sarajevo već realizovani kroz uspostavu sistema transparentnosti, u okviru kojeg informacioni sistem „Anti-CorruptiKS“ omogućava javni uvid u relevantne podatke i pregled po institucijama (uključujući organe uprave i pojedinačno po ministarstvima), uz mogućnost pregleda po periodima. Sistem transparentnosti, zasnovan na odgovarajućim antikorupcijskim propisima, čini 10 *online* registara i dva posebna antikorupcijska alata, sa preko 180 ugrađenih različitih analitičko-statističkih izvještaja. Na ovaj način, ključni rizični procesi u Kantonu Sarajevo učinjeni su transparentnijim i podložnim javnom uvidu i analizi. Takav pristup pruža podatke kontinuirano, odnosno u dinamici ažuriranja od strane nadležnih institucija, što je funkcionalno naprednije od modela koji se zasniva isključivo na godišnjem izvještavanju.

U nastavku dostavljamo pregled ključnih resursa koji su već uspostavljeni i javno dostupni:

1. Registri zapošljavanja i angažmana

Ured je uspostavio i vodi registre koji obuhvataju najvažnije aspekte radnog angažmana u javnom sektoru Kantona Sarajevo, uključujući i podatke relevantne za procese zapošljavanja u organima uprave:

- **Registar zaposlenih u javnom sektoru na području Kantona Sarajevo:** Sadrži podatke o zaposlenima u javnom sektoru ovog kantona, uključujući ime i prezime, instituciju, radno mjesto, stručnu spremu (u obimu propisanom nadležnim aktima), te podatke o plaći. Obaveza unosa i ažuriranja podataka propisana je Odlukom o Registru zaposlenih u javnom sektoru na području Kantona Sarajevo („Službene novine Kantona Sarajevo“, br. 9/19, 23/19 i 6/21), a unos vrše ovlaštena lica u institucijama. Svrha uspostavljanja ovog registra jeste da „služi kao jedinstvena evidencija podataka o zaposlenim licima u smislu člana 1. stav (3) Odluke u organima uprave i institucijama, radi uspostave transparentnog, centralizovanog, kvalitetnog i učinkovitog sistema upravljanja ljudskim potencijalima u javnoj službi Kantona.“
- **Registar ugovora o djelu u organima javnog sektora u Kantonu Sarajevo:** Od 01.01.2024. godine javno su dostupni podaci o angažmanima po osnovu ugovora o djelu u institucijama javnog sektora Kantona Sarajevo, uključujući ime i prezime angažovanog lica, predmet ugovora, period trajanja, te iznose naknada, u skladu sa propisanim obimom podataka. Ovaj registar uspostavljen je na osnovu Odluke o Registru ugovora o djelu u organima javnog sektora u Kantonu Sarajevo („Službene novine Kantona Sarajevo“, br. 9/22 i 54/23). Svrha uspostavljanja ovog registra je da „služi kao jedinstvena evidencija podataka o licima angažovanim po osnovu ugovora o djelu u organima javnog sektora, radi uspostave transparentnog, centralizovanog, kvalitetnog i učinkovitog sistema kontrole trošenja budžetskih i namjenskih sredstava i upravljanja ljudskim potencijalima u javnoj službi Kantona Sarajevo.“
- **Registar javnih oglasa u postupku prijema u radni odnos u javnom sektoru na teritoriji Kantona Sarajevo:** Predstavlja jedinstvenu evidenciju javnih oglasa za prijem u radni odnos u javnom sektoru Kantona Sarajevo, a služi kao „jedinstvena evidencija podataka o javnom oglasu poslodavca koji provodi postupak prijema u radni odnos na određeno i neodređeno vrijeme, a u svrhu prevencije mogućih nezakonitosti ili nesvršishodnosti u postupku provođenja javnog oglasa.“

Napominjemo da navedeni registri omogućavaju pretraživanje i pregled po institucijama i periodima, što praktično omogućava izdvajanje pregleda za organe uprave i pojedinačno po ministarstvima, bez potrebe za uspostavljanjem dodatne paralelne obaveze izvještavanja.

2. Širi antikorupcijski alati i resursi

Sistem transparentnosti Kantona Sarajevo obuhvata i druge ključne oblasti koje su, prema analizama i praksi, podložne koruptivnim rizicima, te je usmjeren na preventivno jačanje integriteta i javnu kontrolu:

- **Upravljačke strukture:** Odlukom o Registru imenovanih lica u Kantonu Sarajevo („Službene novine Kantona Sarajevo“, br. 23/19 i 9/21) uspostavljen je Registar koji „služi kao jedinstvena evidencija podataka o imenovanim licima u Institucijama iz člana 2. ove Odluke koji obnašaju javne funkcije u Kantonu Sarajevo, a u svrhu prevencije mogućih pojava oblika sukoba interesa. Registar imenovanih lica nudi uvid u sastav upravnih i nadzornih odbora, kao i drugih upravljačkih tijela, sprečavajući sukob interesa“; Registar uspostavljen Odlukom o Registru javnih poziva za izbor i imenovanje u organima nadzora, upravljanja i rukovođenja u javnom sektoru Kantona Sarajevo („Službene novine Kantona Sarajevo“, broj: 54/23) „služi kao jedinstvena evidencija podataka o javnim pozivima za izbor i imenovanje u organima nadzora, upravljanja i rukovođenja u javnom sektoru Kantona Sarajevo, a u svrhu osiguranja većeg nivoa zakonitosti, transparentnosti, konkurentnosti i jednakih mogućnosti u ovom procesu.“
- **Javne nabavke:** Registar prati ključne faze postupaka javnih nabavki, od planiranja do realizacije ugovora, čime se jača transparentnost i mogućnost analitičkog praćenja i uporednih pregleda. Odlukom o Registru podataka o javnim nabavkama koje provode institucije čiji je

osnivač Kanton Sarajevo („Službene novine Kantona Sarajevo“, br. 6/21 i 34/22) uspostavljen je Registar koji „služi kao jedinstvena evidencija podataka o javnim nabavkama u Institucijama iz člana 2. ove Odluke koje provode javne nabavke, a u svrhu prevencije mogućih nezakonitosti ili nesvrishodnosti u postupcima provođenja javnih nabavki.“

- **Imovina i pokloni:** Registar podataka o imovini nosilaca javnih funkcija omogućava javnu provjeru i doprinosi prevenciji nezakonitog bogaćenja, u obimu i na način propisan Uredbom o uspostavljanju i vođenju registra ličnih podataka o imovini i postupku provjere imovine nosilaca javnih funkcija u Kantonu Sarajevo („Službene novine Kantona Sarajevo“, br. 25/19 i 19/22);
- **Transferi i poticaji:** Uspostavljeni su registri transfera neprofitnim organizacijama, poticaja u poljoprivredi i poticaja u razvoju male privrede, čime se osigurava transparentnost dodjele javnih sredstava i mogućnost praćenja tokova budžetskih izdvajanja. Ova tri registra uspostavljena su na osnovu Uredbe o dodjeli transfera neprofitnim organizacijama i pojedincima iz budžeta Kantona Sarajevo („Službene novine Kantona Sarajevo“, br. 22/21, 13/22, 21/24 i 10/25), Odluke o Registru korisnika podsticaja u poljoprivredi na području Kantona Sarajevo („Službene novine Kantona Sarajevo“, broj: 11/21) i Odluke o Registru poticaja razvoja male privrede u Kantonu Sarajevo („Službene novine Kantona Sarajevo“, broj: 11/21);
- **Inovativni antikorupcijski alati:** U skladu sa svojim nadležnostima i relevantnim propisima, Ured je razvio posebne antikorupcijske alate, kao što je Interaktivna mapa gradnje objekata i sječe šume na području Kantona Sarajevo, kao poseban geolokacijski alat za borbu protiv korupcije i drugih nepravilnosti u oblasti gradnje i prostornog planiranja. Elektronski plan integriteta je rješenje koje omogućava softversko praćenje planova integriteta i mjera unutar institucija, čime se jača sistemsko upravljanje rizicima i praćenje realizacije antikorupcijskih mjera, kao jedinstven i inovativan pristup u prevenciji korupcije, koji obuhvata institucije javnog sektora Kantona Sarajevo, uključujući i lokalni nivo vlasti.

3. Međunarodna prepoznatljivost i institucionalni okvir

Uspostavljanje i razvoj ovakvog sistema zahtijevali su značajne organizacione, normative i tehničke napore, kao i koordinaciju velikog broja institucija. U tom kontekstu, rezultati jačanja transparentnosti i antikorupcijskih mehanizama u Kantonu Sarajevo zabilježeni su i u najrelevantnijim međunarodnim izvještajima u ovoj oblasti, uključujući izvještaje Evropske komisije i Priebeov izvještaj, te analizama koje se odnose na stanje u oblasti vladavine prava i borbe protiv korupcije.

Ured, u okviru svojih nadležnosti, kontinuirano provodi analize rizičnih procesa u javnom sektoru Kantona Sarajevo i predlaže antikorupcijske mjere radi jačanja transparentnosti i smanjenja rizika. U tom smislu, Ured periodično (u pravilu na godišnjem nivou) sačinjava *Analizu antikorupcijskog okruženja u javnom sektoru Kantona Sarajevo* za prethodnu godinu, koja se u konačnoj verziji javno objavljuje na web stranici informacionog sistema Ureda.

Po potrebi, Ured izrađuje i tematske analize, poput *Analitičko-statističkog izvještaja o ugovorima o djelu u organima javnog sektora Kantona Sarajevo* (npr. za 2024. godinu) ili *Izvještaja o analizi podataka iz Registra zaposlenih lica* (npr. za 2024. godinu). Nalazi se objavljuju javno, a kada se uoče indikacije koje upućuju na potrebu postupanja, dostavljaju se i nadležnim organima, u skladu sa propisima. Analize se, po potrebi, mogu fokusirati i isključivo na organe uprave, uključujući pojedinačno po ministarstvima (primjer takve analize možete pronaći u prilogu).


Radi sticanja jasnijeg uvida u kontekst aktivnosti koje Ured, u skladu sa svojim nadležnostima, provodi u procesu uspostave antikorupcijskog sistema Kantona Sarajevo (u okviru kojeg je sistem transparentnosti integralni dio), u prilogu dostavljamo *Analize antikorupcijskog okruženja u javnom sektoru Kantona Sarajevo* za prethodne godine, uz napomenu da je *Analiza za 2025. godinu* u pripremi. Također dostavljamo i pregled više od 180 analitičko-statističkih izvještaja

koji čine sastavni dio sistema transparentnosti, odnosno online registara i antikorupcijskih alata dostupnih putem web platforme informacionog sistema Ureda.

Zaključno, inicijativu zastupnice smatramo korisnim doprinosom javnoj temi transparentnosti, ali ukazujemo da bi formalno uvođenje dodatne obaveze u formi posebnog godišnjeg izvještaja predstavljalo dupliciranje već uspostavljenih mehanizama i dodatno administrativno opterećenje institucija. Smatramo svrsishodnijim da se u potpunosti koriste postojeći digitalni resursi, pretraživanja i analitičko-statistički pregledi dostupni kroz informacioni sistem „Anti-CorruptiKS“ (www.anticorruptiks.com), uključujući i preglede po institucijama, periodima i drugim parametrima.

S poštovanjem,

ŠEF UREDA



Prilog: 6

Dostaviti:

1. Naslovu,
2. Vlada Kantona Sarajevo,
3. Stručna služba Vlade Kantona Sarajevo,
4. a/a.